



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

19. Kalenderwoche – ab 08. Mai 2011

Lachdaach

Nee, isch hadde nischd zu lachn - am Lachdaach! Isch mussde mid meinor Gudstn in dor Naduhr rumdrammbln, obwohl isch een Schnubbn hadde! Ja, isch hädde offs Sofa geheerd - mid meim Schnubbn! Abor nee, isch mußde mid naus in de Naduhr! Meine Nase is werglisch bald schnellor geloofn, als wie meine Beene!

Wobei isch mir nisch ganz sischor bin, obs werglisch e Schnubbn gewähsn is - odor obs bloß eene allährigische Reagdsjohn off dähn Samenfluch von de Bliedn an de Beeme war. Ährlich, dähr Samenfluch is ja derardisch indensief gewähsn... isch hadde eschd Angsd um meine Gudste! Nisch dass die noch schwangor wern dud!

Abor bis jedzde duds keene Anzeischn gähm. Mir ham dähn Lachdaach soweid ohne Nachwehn ieborschdandn.

Was? Sie kenn dähn Lachdaach gahr nisch? Also - dor indornadsjonale Lachdaach, dähr is am erschdn Mai gewähsn! Vorschn Sonndaach! Ja, am selm Daach, wie wo ooch dor Gambfdaach dor Wergdädischn is!

Das alleene is ja schon e Gegg, wo mor driebor lachn kennde! Brolledarior allor Ländor beeamld eisch! Wenn wir lachn Seid an Seid un de aldn Widze glihingen...

Dähn Lachdaach duds gähm, weil das Lachn ja so sähr gesund sein soll. Im Lexigon dud bei Lachn

schdehn - "Lachen - durch Verziehen des Mundes und gleichzeitigem hörbar stoßweisem Ausatmen Heiterkeit äußern."

Nu kannsde nadihrlisch frachn, was denne Heidorkeid is. Heidorkeid is, wensde lachsd! Un wensde lachn dusd, dann dusde Heidorkeid äußern! Nascha, egahl!

Das Lachn dud ooch mid Joga zusammhäng. Besondorsch in Indijen soll das sähr in Mode sein. Das Lachn däde de Seele un dähn Görbor ginsdisch beeinflussn. Dor Greisloof wird angereeschd. De Musgln wärn durschgeriddld un dun sisich endschbann. Dor Schdress wird besieschd!

Kinnor dun bis zu vierhunnord Ma am Daach lachn. Erwachsne bloß fuffzn Ma. Leide mid Debressjohn lachn fasd nie!

Un am Lachdaach dun sisich dann nu de Lachfenns in allor Weld dreffn, sedzn sisich irschendwo hin un fang an zu lachn. Weeschn nischd! Die lachn eenfach so! Ohne Grund! Das hab isich gelähsn.

Isch hadde ja gedachd, dass da villeischd eenor Widze erzähl'n dud... odor die dun sisich geeschnseidsich an de Fieße grabbl'n... odor am Bauch... odor wo annersch, wo dor Mänsch grabblisch is! Abor nee, die lachn eenfach so! Un beim Lachn dun die sisich dann geeschnseidsich dährardisch offschdachln, dass die nisch mähr offheern kenn mid Lachn. Un da soll sisich ooch schon manschor dodgelachd hamm. Ob dass dann abor noch gesund is...?

Eduard Sachsenmeyer